

**ANG**

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXIV No. 14
Agosto 21, 2003
www.philippinerevolution.org

Editorial

Ginatuytoy sang AFP ang dalan sang kapaslawan

Ang dalan sang pagpangapin sa papet, reaksyunaryo kag nagakadunot nga nagaharing sistema amo ang dalan sang kapaslawan nga ginasunod sang mersenaryo kag papet nga Armed Forces of the Philippines. Samtang nagakadugmok ang nagaharing sistema sa kumunoy sang nagapalala nga krisis, labi ini nga nagasandig sa pasismo sang nagakagaruk nga reaksyunaryo militar. Sa pihak nga bahin, nagatingkad naman ang kagarukan kag kainutilan sang AFP kag ang tendensya sini nga mawasak halin sa sulod kag dalahigon ang bilog nga sistema.



Ang yabi nga halambalanon sa pagkagaruk kag pagpangluya sang AFP amo ang pagka-mersenaryo, papet, reaksyunaryo kag pasista sini, nga nagaabot sa grabe nga pagkahamulag sini sa malapad nga masa. Ang pangpulitika nga pagkabangkarote kag pagkahamulag sini ang basehan nga kahimtangan nga ginaluntaran sang palala nga palala nga internal

nga demoralisasyon, paksyunalisasyon kag inaway.

Nagaserbi kag nagapangapin ini sa interes sang imperyalismong US kag mga

lokal nga nagaharing sahi, ginasakdag ang dumuluong nga interbensyon militar kag ginasuportahan ang papet nga estado kag ang pagtraidor sini sa interes kag sobe-ranya sang pungsod. Mapintas sini nga ginatapna ang mga nagahimakas nga demokratikong pwersa kag pumuluyo. Samtang nagadugay, nagakagisi ang panabon bahin sa pagka-makapungsod sang AFP kag PNP kag nagakapukaw ang patriyotismo bisan sang mga manubo nga upisyal kag ordinaryo nga suldado.

Ang tuman kabaskog nga krisis pangpulitika kag pangkatilingban nagapugong sa ikasarang sang AFP nga lutuson ang rebolusyonaryo nga armadong hublag. Labi pa nga nagadaku ang mga sablag nga ini bangud sa madasig nga pagkagaruk sang bug-os nga nagaharing sistema.

Ginapatuman sang rehimeng Arroyo ang lapnagon nga militarisasyon kag mga pasista nga buhat sang AFP. Makatuga man ini sang pila ka problema nga taktikal batuk sa mga rebolusyonaryo kag progresibo nga pwersa, sa kadugayan mas daku naman ang pagabayaran sang AFP kag gubyerno sa patag militar kag pulitika.

Hitad nga hitad na ang mga pwersa sang AFP. Nakadispusisyon batuk sa Bag-ong Hangaway sang Banwa ang mas o menos 70%

**Mga tampok
sa isyu nga ini...**

**Pagpangibabaw
sg rebolusyonaryo
nga hublag sa ST**

PAHINA 6

**Pagpasilabot
sang US sa sugilanon
pangkalinungan**

PAHINA 8

**Nagabaskog
nga paghimakas
unyon sa SMC**

PAHINA 10

sang kabilugan nga pwersa pang-kombat sang AFP. Pero sa pihak sang kadakuon sang pwersa nga nakapuntariya batuk sa BHB, indi sarang ipabilin sang AFP ang daku nga konsentrasyon sang pwersa batuk sa BHB sa tanan nga bahin sang pungsod. Daku-daku nga pwersa man ang ginagamit sini sa pagbantay sa sentro sang reaksyunaryo nga gahum bangud sa mga pamahug sang kudeta; luwas pa sa pagbato sa Moro Islamic Liberation Front, Abu Sayyaf kag iban pa nga armado nga pwersa nga kinahanglan atubangon sa pagdepensa sa reaksyunaryo nga gubyerno.

Sa pagtinguha nga mapangibabawan ang limitasyon sa pwersa, ginagamit sang AFP ang taktika sang madasigan nga mobilisasyon, pagsaylu-saylo kag relatibo nga pagkonsentrar sang dalagku nga pwersa sa ginasigahum sini pinakamabaskog nga prenteng gerilya sang BHB kag iban pa nga lugar kon sa diin nagabaskog ang mga armado nga pagpakig-away. Sa masobra 120 prenteng gerilya sang BHB, maisip lang sa mga tudlo ang mga prenteng gerilya nga sarang sini konsentrasyon sa isa ka panahon.

Daw lipong nga bumbero, naga-

saylu-saylo ang AFP sang atensyon sa diin man mag-ibwal ang kalayo sang mga taktikal nga opensiba sang BHB. Kon usisaon, nagaumpisa pa lang ang liwat nga pagpagsik sang mga taktikal nga opensiba sang BHB.

Sa kabilugan, nagaabot sa 270,000 ang numero sang armado nga pwersa sang nagaharing estado. Bisan mas daku ini sangsa sad-tong panahon sang diktaduryang Marcos, labi na napaluya na ini. Kadungan sa dugang nga rekrutment sa AFP, ang mas daku nga pangpuno sang reaksyunaryo nga estado amo ang mga pwersa sang Philippine National Police kag labing ginpadamo pa nga CAFGU kag iban pa nga grupo paramilitar, nga lunsay indi masaligan sa mga inaway. Bangud 80% sang badyet sang militar naubos na sa sweldo, pensyon kag iban pa nga kinahanglanon sang mga tinawo sang AFP (luwas pa sa ginakawat sang mga puno ang kadam-an sini), nagakulang ang suplay para sa mga kinahanglanon nga armas kag kagamitan militar.

Sa atubang sang nagapalala nga krisis pang-ekonomya, masyadong pabug-at na sa pumuluyo

ang AFP kag bilog nga establisyementong militar. Ang dalagku nga alokasyon kag padaku nga padaku nga resorsa nga ginahigop sang mga kontra-rebolusyonaryo nga gera nga wala ikasarang nga tapuson kag ipadaug sang AFP nagabunggo sa palala nga palala nga palaligban sang nagapadaku nga depisit sang gubyerno. Gani labi nga nabudlayan ang bangkarote nga reaksyunaryo nga estado nga ihatag ang dugang nga resorsa nga ginapangayo sang AFP. Mahatag lang ini kabaylo ang daku nga pagbuhin sa mga kinahanglanon nga serbisyo sosyal, dugang pagpuga sa pumuluyo, dugang nga pagsingki sang sosyo-ekonomiko nga krisis kag labi nga pagbaskog sang pagkaakig sang pumuluyo sa gubyerno.

Yabi sa kalitatibo nga pagtaas sang ikasarang AFP sa kontra-rebolusyonaryo nga gera ang dalagkuan nga bulig militar halin sa US. Gani bulag nga ginasakdag sang papet nga gubyerno ang pangkalibutanon nga "gera kontra-terorismo" sang US kag ginabuyok ang pagbase kag pagpasilabot sa Pilipinas sang mga armadong tropa sang US. Nagapati man ang mga puno sang reaksyunaryo nga gubyerno kag militar nga kinahanglanon na gid ang direkta nga interbensyon-militar sang US bangud indi masarangan sang mga papet nga tropa nga epektibo batuan ang nagabaskog na nga rebolusyonaryo nga pwersa. Labi sini nga ibuyo ang AFP sa pagkammerse-naryo kag pagkapapet nga labing magawasak sa anuman nga ginasigahum nga integridad bilang isa ka pungsodnon nga hangaway.

Ang nagabaskog nga demoralisasyon kag pagkatunga-tunga sang AFP amo ang nagaduso sini sa dalan sang pagkalutos. Ang mabaskog nga pagbato sang rebolusyonaryo nga hublag kag pumuluyo kag sunod-sunod nga mga pagkalutos kag nagapadayon nga atrisyon

<div data-bbox="142 1304 477 1402" data-label="Image"> </div> <p>Tuig XXXIV No. 14 Agosto 21, 2003</p> <p>Ang Ang Bayan ginabantala sa lengwahe nga Pilipino, Bisaya, Iloko, Hiligaynon, Waray kag Ingles. Mahimo ini i-download halin sa Philippine Revolution Web Central nga makit-an sa: www.philippinerevolution.org. Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan. Malab-ot kami paagi sa e-mail sa: angbayan@yahoo.com</p>	<h2 data-bbox="558 1331 721 1371">Kaundan</h2> <table data-bbox="558 1413 1006 1854"> <tr> <td>Editorial: Ginasunod sg AFP ang dalan sa kapaslawan</td><td>1</td></tr> <tr> <td>Malala nga korapsyon sa AFP</td><td>4</td></tr> <tr> <td>Pagpangibabaw sg rebolusyunaryo nga hublag sa Southern Tagalog</td><td>6</td></tr> <tr> <td>Pagpasingki sg pangpulitika nga interbensyon sg US sa pungsod</td><td>8</td></tr> <tr> <td>Nagabaskog nga paghimakas unyon sa SMC</td><td>10</td></tr> <tr> <td>Ka Bert Olalia-dungganon nga baganihan sg sahing mamumugon</td><td>11</td></tr> <tr> <td>Mga opensiba sg BHB</td><td>13</td></tr> <tr> <td>Balita</td><td>14</td></tr> </table>	Editorial: Ginasunod sg AFP ang dalan sa kapaslawan	1	Malala nga korapsyon sa AFP	4	Pagpangibabaw sg rebolusyunaryo nga hublag sa Southern Tagalog	6	Pagpasingki sg pangpulitika nga interbensyon sg US sa pungsod	8	Nagabaskog nga paghimakas unyon sa SMC	10	Ka Bert Olalia-dungganon nga baganihan sg sahing mamumugon	11	Mga opensiba sg BHB	13	Balita	14
Editorial: Ginasunod sg AFP ang dalan sa kapaslawan	1																
Malala nga korapsyon sa AFP	4																
Pagpangibabaw sg rebolusyunaryo nga hublag sa Southern Tagalog	6																
Pagpasingki sg pangpulitika nga interbensyon sg US sa pungsod	8																
Nagabaskog nga paghimakas unyon sa SMC	10																
Ka Bert Olalia-dungganon nga baganihan sg sahing mamumugon	11																
Mga opensiba sg BHB	13																
Balita	14																
<p>Ang Ang Bayan ginabantala duha ka beses kada bulan sang Komite Sentral sang Partido Komunista sang Pilipinas.</p>																	

sa mga kamot sang mga rebolusyonaryo nga pwersa nagahatag sang nagapalala nga desperasyon sang mga armado nga pwersa sang guberno.

Ginpalala pa ini sang mas mataas nga pamunuan sa guberno kag militar bangud wala pili nga pangbala sa kanyon ang mga suldado, ginaduso sila sa wala rason nga mga pag-away kag ginamanduan maghimo sang wala pili nga pag-panghalit, mahigko nga padihot kag makangingil-ad nga mga krimen batuk sa pumuluyo. Indi na ini mabatas sang nagapadamo nga upisyal kag suldado.

Duna sa AFP ang indi demokratiko, mapiguson kag pasista indi lang sa patrato sa pumuluyo kundi pati sa relasyon sa tunga sang mga upisyal kag ordinaryo nga suldado bangud isa ini ka mapintas nga instrumento sang mga reaksiyunaryo nga nagaharing sahi agud ulipunon kag himuslan ang pumuluyo.

Labi pa nga matunga-tunga ang mersenaryo nga armadong pwersa bunga sang ribalan sang dalagku nga pulitiko kag paggamit sang mga ini sa AFP kag PNP para sa ila paksyunal nga interes. Lapnagon man ang korapsyon kag pag-pangawat, pagka-imbolbar sa mga sindikato kriminal, sobra-sobra nga pribilehiyo kag maluhog nga pagpangabuhing sang mga puno sang guberno kag organisasyon militar nga labi nga nagpabudlay sa pagbato sang ila mga armado nga pwersa.

Bisan nga sobra-sobra sa subong ang superyoridad sang AFP sa BHB sa halambalanon sang tinawo, armas, organisasyon kag pinansya, indi sini mapunggan ang padayon nga pagsulong sang inaway banwa.

Ang suporta sang masa sa BHB ang desaysibo nga sangkap sa pagpadaog sini. Nakasandig ini sa nagapalapad kag nagapadalom nga baseng masa, sa rebolusyong agraryo kag sa mabaskog nga partisipa-

syon kag suporta sang masa sa inaway banwa. Upod nga ginapakig-away sang BHB kag sang masa ang maayo nga buasdamlag para sa pumuluyo. Ginatiglawas sang BHB kag sang rebolusyonaryo nga kahublagan ang mga rebolusyonaryo nga handum kag pungsodnon-demokratiko nga programa nga nagasulong sa interes sang pumuluyo. Ginabululigan sang BHB kag sang masa ang pagpukan sang daan kag garuk nga areglo agud tukuron ang bag-o kag abanse nga sistema pangkatilingban.

Indi mabalibaran nga sangkap sa pagpadaog sang BHB ang malapit sini sa masa sang pumuluyo. Naghalin ang kadam-an sang mga pwersa sini sa pinakamaayo nga anak sang banwa. Nakasentro ang

**Indi mabalibaran
nga sangkap sa
pagpadaog sang BHB
ang malapit sini sa masa
sang pumuluyo.**

kadam-an nga panahon sini sa hilikuton pangmasa nga malahalon nga paktor sa maayo nga hilikuton militar. Ginabuhing sang hilikuton pangmasa ang mga pwersa sang BHB gani wala ini nakasandig sa anuman nga ayuda sa guwa. Sa tanan nga mga aksyon kag hilikuton sini, permi sini ginalantaw ang interes kag ikaayo sang pumuluyo. Dala sang mga upisyal kag hangaway sini ang mataas nga diwa sang pagbato.

Dungan nga nagaluntad ang demokrasya kag disiplina sa sulod sang BHB. Hugot sini ginapatuman ang Tatlo ka Pangunahon nga Pagsulundan kag Walo ka Bagay nga Dapat Tandaan sang hangaway sang banwa kag mga pagsulundan sang Partido kag BHB. Kadungan

sini ang mapagsik ginapatuman ang sistema sang tatlo ka demokrasya—demokrasya sa pulitika, demokrasya sa ekonomya kag demokrasya militar.


Maid-id ginatun-an kag ginasantong sang Partido kag BHB ang kahimtangan kag ang kinaiya kag hulag sang mga reaksiyunaryo nga pwersa militar. Gani epektibo nakabalay ang BHB sang madinalag-on nga estratehiya kag mga taktika sa pagpasulong sang inaway banwa. Sa malakolonyal kag malapyudal nga kahimtangan sang pungsod kag sa subong nga halintang sang inaway banwa, husto nga ginapatuman sang BHB ang estratehiko nga linya sang pagpalibot sa kasuyudaran halin sa kaumhan tubtub sa mapukan sa katapusan ang pinakasentro sang gahum pangpulitika sang kaaway.

Nagalunsar ang BHB sang lapnagon at maikit nga pagpakig-away gerilya. Nagalunsar ini sang mga taktikal nga opensiba batuk sa mahina kag nahamulag nga pwersa sang kaaway samtang ginalikawan mag-engkwentro sa mas mabaskog nga pwersa sang kaaway. Nagapalapad ini sa mga lugar nga mahina ang kaaway bisan ginapat-ud nga napadayon ang hilikuton pangpulitika, namentenar ang angot, pagubay kag pag-organisa sa masa kag napasulong ang mga paghimakas masa sa mga lugar nga mabaskog ang konsentrasyon kag pagpanghalit sang militar.

Samtang ginasunod sang mga reaksiyunaryo nga armado nga pwersa sang kaaway ang dalan sang kapaslawan, nagamartsa naman ang BHB kag mga rebolusyonaryo nga pwersa sa dalan sang pat-ud nga kadalagan. Wala duda ang nagapadayon nga pagsulong sang inaway banwa mapapas sang BHB kag mga rebolusyonaryo nga pwersa ang AFP kag iban pa nga reaksiyunaryo nga pwersa kag magum ang lubos nga kadalagan. **AB**

Malala nga korapsyon sa AFP

Lapnagon ang korapsyon kag kriminalidad sa bug-os nga establisyemento militar. Imbolbado diri ang pinakamataas nga upisyal sang Armed Forces of the Philippines, Philippine National Police kag Department of Defense. Luwas sa pagbaton sang sari-sari nga suhol sa pagbakal sang mga gamit-militar kag iban pa nga suplay, ginapamunuan nila ang pinakamalaut nga kriminal nga sindikato.



Matapos dramatiko nga ginbuyagyag kag kundenahon sang mga manubo nga upisyal sang AFP ang lapnagon nga korapsyon kag pagpamigos sang mas mataas nga upisyal sang AFP kag rehimeng Arroyo sadtong Hunyo 27, indi na mapunggan sang rehimen ang pagkalkal sang mga kaso sang korapsyon kag anomalya sa AFP. Sining Agosto 18, nabuyagyag ang anomalya sa Government Arsenal (GA). Suno sa Commission on Audit, may ara P77 milyon nga nadula sa tunga sang imbentaryo kag aktwal nga gingastos. Ang GA ang natalana tagahimo sang mga basehang armas, bala kag iban pa nga gamit sang pulis kag militar. Nakapadailom ini sa DND.

Madamo nga pamaagi ang militar agud mahukhok ang pondo sang AFP. Isa na diri ang pagpahabok sang presyo sang mga kinahanglanon sang militar. Nabuyagyag, halimbawa, nga sa pagpakayo sadtong 1998 sang mga tangke nga Scorpion sang militar nga may badyet nga P200 milyon, ang pyesa nga *contact point* na P1,852.50 lamang ginhimo nga P30,000. Ang P99, 750 nga orihinal nga presyo sang *gear box assembly* sang tangke nangin P12,900,000.

May ginatawag man nga sistema nga "*recycled delivery supplies*." Sa iskema nga ini, ang mga suplay nga gina-order hungod wala ginadeliber sa kampo sang tingub agud ang yadtong nauna na nga nagabot nga bats pagguwaon man sa masunod nga bats.

Malaut pa ang "*ghost delivery*"

kon sa diin wala sang suplay nga nagaabot sa AFP kag sa baylo ginaparte-parte na lang sang mas mataas nga upisyal kag sang kumpanya ang pondo para sa mga gin-order nga kinahanglanon sang militar.

Manubo ang kalidad sang mga suplay nga ginabakal agud makamenos kag mabulsa ang mabilin sa pondo. Sadtong Pebrero 2001, ginbuyagyag ni Commodore Guillermo Wong, sadto hepe sang Philippine Navy, ang anomalya sa pagbakal sang *kevlar helmet* kon sa diin indi himo sang *kevlar* ang aktwal nagaabot. Apat ka parte lang sang ginresibuhan ang nag-abot—500 sa baylo nga 2,000 ka bilog. Imbolbado sa anomalya nga ini ang hepe sadto sang Philippine Marines.

Isa sa ginasugid nga pinakamalala nga porma sang korapsyon sa militar ang *conversion*. Sa iskema nga ini, ginahimo nga kas ang badyet nga nakatalana para sa mga kinahanglanon sang militar. Pabuhin nga pabuhin ang kwarta samtang nagsaylu-saylo sa mga kamot sang mga upisyal. Ginasiling nga 25% ang kinaandan ginabuhin sang mga taga-aprubar kag taga-awdit sa badyet nga ginakambyo nga kwarta. Siyam tubtub 16% na lang sang badyet ang aktwal nga ginagastos para sa kinahanglanon sang militar.

Indi lang nagapangurakot ang mas mataas nga upisyal militar. Wala sila nahadlok nga ipabugal ang ila mga pinamuyungan paagi sa ila maluhu nga pangabuhi. Kadam-an sa ila mga milyonaryo. Sa kamatu-

ran, ang tanan nga 37 heneral nga ginkumpirma sang Commission of Appointment sini lang nagaako nga mga milyonaryo base sa ila mga ginsumiter nga *statement of assets and liabilities* (SAL). Ang "pinakaimol" sa ila may kita kag propyedad nga nagabili sang P1 milyon samtang ang pinakamanggaranon nagrekord sang P13.4 milyon.

Halimbawa na diri si Defense Sec. Angelo Reyes nga nagaako lamang sa manggad nga P3.5 milyon nga sa matuod nagaabot na sa P14 milyon ang bili sang duha pa lang sa iya mga propyedad. Isa sa mga propyedad nga ini ang iya duta sa Fort Bonifacio nga ginalista niya nga nagabili sang P115, 000 nga sa matuod ang bili sa merkado P4 milyon. Sa duta nga ini ginpatukod ni Reyes ang malapalasyo nga balay nga nagakantidad sang masobra P10 milyon. Dugang pa diri, kinaandan nga gawi na para sa mga upisyal sang gubyerno ang indi paglakip sang ila pinakamapuslanon nga mga propyedad sa ila mga SAL.

Makita sa AFP Officers' Village Association, Inc. (AFPOVAI) kag sa nakareserba nga lugar para sa Joint U.S. Military Advisory Group (JUSMAG) sa Fort Bonifacio ang mga mansyon kag nakaparada nga mga matahom nga salakyan sang mga heneral sang AFP.

Sa pihak nga bahin, ang pinakadamo nga numero sang mga ordinario nga suldado nakaestar sa mga

barung-barong nga nakatindog sa mga kadutaan nga ginabawal sa ila sang gubyerno. Halimbawa sini ang isa ka komunidad sang masobra 100 pamilya sang mga retirado kag aktibo nga ordinaryong suldado sa Sityo Kaunlaran, West Bicutan nga nasakup sang Fort Bonifacio. Pila ka beses nga ginguba ang mga balay sa lugar. Suno sa AFP, nakatalana nga ihatag ang pwesto diri sa mga upisyal militar.

Ginkinutan sang nagsulunod nga rehimen ang paghimo sang mga pabalay sang mga ordinaryo nga suldado. Masami isa ka gamay katama nga espasyo para sa isa ka pamilya. Halimbawa sini ang pabalay sa Centennial Village sa Fort Bonifacio nga ginhimo sa panahon sang rehimeng Ramos. Himo sa pigaw nga materyales ang mga bilding nga may peligro mahulog kon mas mabaskog nga linog bangud sa nagalitik-litik ang semento.

Tubtub subong, wala sang nasilutan ang malaparan nga pangurakot sang mga heneral kag upisyal sang AFP sa Armed Forces of the Philippines-Retirement and Separation Benefits Systems (AFP-RSBS). Nabulgar sadtong panahon sang rehimeng Estrada nga ginbulsa ni Gen. Jose Ramiscal Jr., kahimbon ang iban pa nga upisyal, ang masobra P250 milyon halin sa pondo pangpensyon kag pangretiro sang mga ordinaryo nga suldado. Kahimbon nila ang sadto Chief of Staff sang AFP nga si Lisandro Abadia. Sa baylo nga silutan, madamo sa mga gin-imbestigahan nga upisyal ang ginsaylo lang sang trabaho kag may ginpasakaan pa sang ranggo. Sa baylo nga gamiton ang pondo para sa mga suldado, ginsulod sang mga upisyal sang AFP ang kwarta sa indi-istable nga iskema kag korporasyon agud madasigan nga magkita ini kag lubos nga panginpulan sang mga upisyal militar, lakip si anay Defense Sec. Orlando Mercado.

Ang baraghal nga pagpatay kay Jessica Chavez

SADTONG Pebrero 9, 2001, nasapwan sang pareho niya suldado nga nagahimumugto kag may igo sang pusil sa dughan nga si 2Lt. Jessica Chavez sa iya kwarto sa sulod sang hedkwarters sang AFP sa Fort Bonifacio, Makati. Wala na siya makaabot nga buhi sa ospital. Sa baylo nga hulaton ang mga imbestigador, gilayon nga ginmandu sang mga upisyal sang iya batalyon nga limpyuhon ang iya kwarto kag ihaboy ang anuman nga mahimo mapuslan sa imbestigasyon. Nagserbi nga *platoon leader* si Jessica sa 191st Military Police Battalion nga nakaistasyon sa Fort Bonifacio.

Pagkatapos ang pakita-tawo nga imbestigasyon, gindeklarar sang AFP nga nagpakamatay si Jessica. Pero suno sa *medico-legal* sang National Bureau of Investigation, imposible nga ginpatay ni Jessica ang iya kaugalingon bangud malayo sa iya lawas ang pusil sang ginpalupok ini. Mabudlay man para sa nagapakamatay nga iduot sa dughan ang pusil agud patyon ang kaugalingon. Labaw pa diri, negatibo sa *powder burns* si Jessica, gani indi mahimo siya ang may kapot sang pusil nga nagpatay sa iya. Sa amo man, gindeklarar sang NBI nga nagpakamatay si Jessica sa ulihi nga report sini.

Duha ka bulan antes siya patyon, nagpauli sa iya pamilya nga nagalibog ang ulo si Jessica sa Poblacion, Sta. Cruz, Ilocos Sur. Gintuad niya sa iya lola nga ginakasangkapan siya sang iya mga superyor sa ilegal nga pagbaligya sang mga armas kag iban pa nga maanomalya nga transaksyon. Isa na diri ang pagsugo sa iya nga kuhaon ang isa ka kargamento sang mga armas halin sa Mindanao sa piyer sang Manila agud ibaligya ang mga ini sa guwa sang AFP. Agud mapat-ud ang iya lealtad, gintanyagan siya sang daku nga kantidad pero ginbalibaran niya ini. Ginpaabot niya sa iya pamilya ang iya desisyon nga maghalin na sa militar kag ibuyagyag ang kagarukan sa AFP. Wala na niya matigayon ang iya plano.

Pila ka adlaw pagkatapos siya patyon, nakit-an sang iya pamilya ang isa ka *cassette tape* nga nagrekord sang makaduluda nga pagsugilanon sang apat ka tawo nga nagadetalye sang isa ka iligal nga operasyon. Wala ini ginsapak sang mga upisyal sang AFP sa ila “imbestigasyon.”

Maathag nga ginpatay si Jessica para indi niya mabuyagyag ang lapnagon nga korapsyon sa sulod sang iya batalyon. Nagapati ang iya pamilya kag mga kaklase nga kon buhi pa siya, kabahin` siya sa mga nag-alsa nga suldado sadtong Hulyo 27.

Ginbulsa sang mataas nga upisyal ang makuha nga ganansya sa mga negosyo nga ginapadalagan sang mga ini. Halimbawa sini ang pagkupit nila sang milyun-milyon nga piso nga kita kada bulan halin sa mga *golf course* sa Camp Aguinaldo kag Fort Bonifacio. Madali matukod ang mga negosyo sa ngalan sang

AFP bangud wala na ini ginapangitaan sang mga *building permit* kag *business permit* kag libre man ini sa pagbayad sang buhis. Wala ginareport ukon ginaawdit ang mga negosyo nga ini sang gubyerno. Ginapadalagan ang mga ini bilang mga pribado nga negosyo sang mga mataas nga upisyal. AB

Pagpangibabaw sang rebolusyonaryo nga kahublagan sa Southern Tagalog

(Ang masunod ginkuha sa dokumento nga "Pagtatasa ng mga Rebolusyonaryong Gawain sa 2002 at mga tungkulin ng mga Rebolusyonaryong Pwersa sa Timog Katagalugan" nga ginpagguwa sadtong Marso 2003. Pila lang sa mga paktor sa madinalag-on nga pagsagang sang rehiyon sa mga atake ng AFP ang ginhatagan-tum-ok sang masunod nga artikulo.)

Sa nagtaliwan nga lima ka tuig, gin-atubang sang rebolusyonaryo nga hublag sa Southern Tagalog (ST) ang wala hawid nga pagpanalakay sang mga tropa sang reaksyunaryo nga gubyerno. Wala sang kapares ang sakup, kalawig kag kabaskog sini sa bilog nga kasaysayan sang rehiyon. Mangin sa kasaysayan sang Partido kag rebolusyonaryo nga hublag, subong lang gintambak sang reaksyunaryo nga estado ang tama kadaku nga pwersa para sa "kontra-insureksyon" sa isa ka rehiyon kag sa partikular, sa pila ka pili nga prubinsya sini. Pero wala ni isa ka prenteng gerilya ang nasarangan waskon sang amo nga tinipon nga pwersa sang kaaway.

Sugod sa ginpahalín nga rehimeng Estrada tubtub sa rehimeng Arroyo, ginhimo nga "pungsodnon nga prayoridad" sang AFP ang bilog nga ST. Nag-umpisa ang dalagkuan, wala hawid kag mapintas nga operasyon sa prubinsya sang Laguna sadtong 1998. Sumaylo sa Oriental Mindoro tubtub sumakup sa bilog nga isla sang Mindoro sadtong 2001. Kadungan sini, naghimo sang mga operasyon nga pamugong (*containment operations*) sa iban nga prubinsya. Sadtong una nga kwarto sang 2003, umabot na sa katumbas sang 38 batalyon ang ara

sa rehiyon—19 batalyon sang AFP, pito ka batalyon sang PNP kag 12 batalyon sang CAF-GU.

Umpisa 2001, dugang ginpabaskog sang kaaway ang ila pwersa kag naggamit ini sang pinakamapintas nga porma sang terorismo sa basehan nga lebel agud waskon ang baseng masa sa kaumhan kag piangon ang ligal nga demokratiko nga kahublagan masa. Labi pa sini ginpabaskog halin nagapatapos ang 2002 tubtub 2003.

Ginpataas sang rehimen ang lebel sang pagplano sa lebel sang brigada kag *area command*, mas ginpalapad ang sakup (pinakagamay ang isa ka prenteng gerilya) kag naggamit ini sang daku nga numero sang tropa (minimum na ang isa ka batalyon) kag taktika nga dumog sa mga operasyon militar.

Nagagamit man ang kaaway sang mas mabug-at nga armas pareho sang mga *mortar* kag *howitzer* kag suporta pangkahanginan sa mga inaway. Luwas sa mga ordinario nga helikopter, nagagamit man sang *jet fighter bomber* sa isa ka insidente sang depensiba sa Batangas.

Ginpwesto sa mga prayoridad nga erya ang pinakamapintas kag berdugo nga upisyal militar. Ginbutang sa 202nd Bde si Col. Efren Orbon, anay kumander sang Task Force Makiling kag sa 204th Bde si Col. Jovito Palparan, anay kumander sang Joint Task Force Banahaw.

Ginpasanyog man ang opera-



syon sikolohikal sang mga Re-engineered Special Operations Team (RSOT). Nagasabwag ang mga ini sang pagpaniplang, pagpamahug kag terorismo sa pumuluyo. Madamo ang ginkuot kag ginapatay sa pinakamapintas nga paagi agud magtuga ang pinakamabaskog nga epekto sang teror. Ang iban ginapatay sa atubang sang ila pamilya. Gina-utdan ulo, ginaabusuhan ukon indi gani ginasunog ang mga bangkay.

Ginainitan sang militar bisan ang ara sa ligal nga organisasyong masa kag pati mga tawong simbahan kag tagasakdag sang tawhanon nga kinamatarung. Tampok diri ang pagkuot kag pagpatay kandy Edén Marcellana kag Eddie Gumanoy.

Sa atubang sang mabaskog kag mapintas nga operasyon sang kaaway, madinalag-on na nangibabaw ang rebolusyonaryo nga hublagan kag pumuluyo. Indi lang sini napreserba ang kaugalingon, pada-

yon pa ini nga nakatipon sang kusog sa pihak sang mga kahalitan nga naagum sini. Mayorya sang mga prubinsya kag prenteng gerilya sang rehiyon nagrehistro sang nagkalain-lain nga lebel sang pagsulong. Ginbawi sang mga pagsulong nga ini ang madalom nga pagtibusok sang mga rebolusyonaryo nga hilikuton kag organisasyon sa isa ka prente nga pangunahon ginakonsentrahan sang atake sang kaaway kag may bahin nga ginatras sa pila ka lugar nga mabaskog man ginaatake sang kaaway.

Nangin daku nga bulig ang pagpatuman sa rehiyon sang redispusisyon kag pagreistratura sang mga pwersa sang hangaway sang banwa santo sa direktiba sang Komite Sentral sadtong katung-anan sang 2002. Ginhimo nga basehang pormasyon sang Bag-ong Hangaway sang Banwa (BHB) ang platun, sa baylo nga daan nga naandan nga pinagamay nga iskwad. Naghamtang ang pagreistratura nga ini sa BHB sa mas luwas kag epektibo nga kahimtangan agud ipatuman ang mga tulungdan militar kag ang hilikuton pangmasa labi na sa atubang sang labing nagabaskog nga sitwasyon militar sa bilog nga rehiyon. Naghatag ini sang kusog kag kalig-on sa hangaway sang banwa nga sagngon kag atubangon ang “all-out war” sang rehimeng Arroyo.

Antes pa sini, ginpatuman man ang mga tikang para pauswagon ang organisasyon sang hangaway sang banwa base sa memorandum sang Komiteng Tagapagpatuman sang Komite Sentral. Gintukod ang mga espesyal nga yunit sang hangaway sang banwa kag ginpabaskog ang mga sentro de grabidad sa lebel sang rehiyon, prubinsya kag prente. Gintukod man ang mga teritoryal nga kumand sa opera-

syon sa mga prubinsya kag ginpauswag ang ikasarang sang akademya sa pulitiko-militar sang hangaway sang banwa sa lebel sang rehiyon kag prubinsya para sa paghanas.

Sa atubang sang mas masingki nga kampanya kag supresyon kontra-gerilya sang kaaway, padayon nga nagtinguha ang hangaway sang banwa nga pangibabawan ang kabudlayan, maglikaw makadepensiba kag ilunsar ang masarangan nga taktikal nga opensiba.

Sa bilog nga tuig sang 2002, natabo ang 76 nga inaway. Kadam-an sini (63%) sa inisyatiba sang hangaway sang banwa. Sa mga taktikal nga opensiba, 46 ang napatay kag 32 ang napilasan sa kaaway. Tampok diri ang magkasunod nga reyde sa munisipyo sang Lopez kag sa ditatsment sang 74th IB sa San Narciso, Quezon. Bisan sa mga depensiba nga inaway, madamo man ang nahalitan sa kaaway—40 ang napatay kag 21 ang napilasan.

REBOLUSYONG AGRARYO, KAMPANYANG MASA KAG PANGPULITIKA NGA PAGHULAG

Indi magdaku kag magdugay ang hangaway sang banwa kag indi man magsulong ang armado nga paghimakas kon wala ini sang malapad kag madalom nga suportang masa. Katuwang sang pagkusog sang hangaway sang banwa kag pagsulong sang armadong paghimakas sa ST ang mapagsik nga pagpasulong sang mga paghimakas antipyudal kag iban pa nga pangmasang paghimakas sa mga prenteng gerilya sa rehiyon.

Ang mga natipon nga kadalagan nga naagum sa rebolusyong agraryo ang nagpalig-on sa hugot nga relasyon sang Partido kag hangaway sa malapad nga masa sang mangunguma sa kaumhan kag na-

gasiguro sa nagapadaku nga suportang masa para sa demokratiko nga rebolusyon sang banwa. Ini man ang nagasiguro nga mapaslawan ang mga pagtinguha sang kaaway nga waskon ang pangpulitika nga pundasyon nga natukod sang Partido kag hangaway sang banwa.

Mapagsik nga nagapartisipar ang pumuluyo sa mga antipyudal nga paghimakas kag iban pa nga pangpulitika nga kampanya kag paghulag.

Lakip sa mga kadalagan sa nagkalain-lain nga lugar ang pagpanubo sang renta sa duta, ang pagpanubo sang *resikada*¹ nga ginapatong sang mga pesador sang kopra, ang pagbato sa pag-agaw sang duta kag pagtukod sang *land-fill*², ang pag-insister sang mga mangunguma sang kinamatarung nila sa pag-estar, ang pagbawi sang mga pungsodnon nga minorya sa *ancestral* nga kadutaan nga ginhimo nga *logging concession*, kag iban pa.

Sa kadam-an, ang mga lugar nga may mainit nga isyu kag away ang isa man nga ginatarget sang mga operasyon militar kag saywar sang AFP. Pero sa kadam-an man, nakapangibabaw ang pumuluyo diri sa sitwasyon militar kag labi sila nangin aktibo kag nagabato sa pagpasulong sang ila mga demokratiko nga interes. Nagapadayon ang tanan sang naagum nga kadalagan sang rebolusyong agraryo sa nagtaliwan kag ang mga kadalagan sang pangmasang paghimakas napuslan sang masa.

Nagapadayon nga malig-on kag nagabato ang baseng masa sa kabilugan, bisan may mga bahin nga temporaryo ginbayaan anay sang BHB bangud sa sobra kadamol sang kaaway. Sa mga lugar nga temporaryo ginbayaan, namentenar giha-pon ang mataas nga lebel sang militansya kag pagbato sang pumu-

¹ Pagbuhin sa bayad sa kopra sa porsiyento sang pagkabasa sini


² Malapad nga lugar nga talambakan sang basura

*Pagpasingki sang pangpulitika
nga interbensyon sang US sa pungsod*

Paggamit sang proseso pangkalinungan

Kadungan sang interbensyon militar sini sa Mindanao, direkta na subong ginapasilabtan sang imperyalismong US ang sugilanon pangkalinungan sa tunga sang Moro Islamic Liberation Front (MILF) kag sang rehimenng Arroyo. Para diri, ginagamit sang US ang ahensya nga US Institute for Peace (USIP) agud makapadala diri sang iya mga ahente sa sugilanon pangkalinungan kag sa aktwal idiriher kag kontrolon ang proseso. Ginapakita sini

sundan sa "Paggamit...", pahina 9



"Pagpangibabaw...", halin sa pahina 7

luyo kag napabilin nga nagatindog ang mga alagyan sang mobilisasyon kag mga panawagan kag ang mga pamaagi nga hayag kag ligal para sa paghulag sang pumuluyo. Nangin malahalón nga sangkap ini sa pagpreserba sa kalig-on sang baseng masa kag sa kabudlayan sang kaaway nga pahinaon kag pasurenderon ang pumuluyo. Sa kamatuoran, paísa-ísa lang ang nahimo nga tiplangon sang kaaway. Bisan sa mga militarísado nga baryo, handa gihapon ang pumuluyo nga itib-ong ang armadong paghimakas kag magbulig sa paglunsar sang pagsilut kag mga taktikal nga opensiba.

Nagtampok ang mga antipasis-ta nga paghimakas. Ang tanan nga mga atake sang kaaway sa kaumhan ginasabat sang mga paghulag kag protesta sang pumuluyo. Nagdamo ang mga suporta nga paghulag sa porma sang mga *fact-finding mission*, *medical mission*, protesta sa nagkalain-lain nga kampo, mga ahensya militar kag sibilyan sa mga lugar kon sa diin pinakamabaskog ang pagpanalakay sang AFP. Naki-pagdayalogo ang pumuluyo sa mga lokal nga gubyrno kag militar,

ginkumpronta ang AFP kag ginhi-wat ang mga asembliya sang pumuluyo sa baryo agud kundenahon kag ibuyagyag ang kalakasan militar. Hayagan nga ginapakita sang pumuluyo sa baryo nga wala nila ginabaton ang AFP bangud ginalapas sini ang ila mga kinamatarung. May mga likum nga paghulag kag kampanya agud estoryahon kag nyutralisahon ang mga mangunguma kag pamatan-on sa baryo nga ginarekrut para mangin soldado kag elemento sang CAFGU.

Dugang diri, daku ang ginatungdan nga papel sang demokrati-ko nga kahublagan sa mga syudad kag sentrong banwa para sa pagpa-ngapin sa mga kinamatarung sang pumuluyo sa kaumhan kag mga pagbato sa militarisasyon sa bilog nga rehiyon. Ang mga ginlunsar nga mga paghulag sa syudad kag baryo sa mga militarísado nga prubinsya nakapadupol sa epekto sang teror sa kaumhan. Isa ka matingkad nga halimbawa ang away sang mga *internal refugee* kag iban pa nga biktima sang paglapas sa tawhanon nga kinamatarung nga nangin mainit nga halambalanon nga indi na matago ukon takpan sang rehimen.

MGA HANGKAT SA REBOLUSYONARYO NGA KAHUBLAGAN KAG PUMULUYO SA REHIYON

Gintilawan sang nagligad nga lima ka tuig indi lang ang kabakod kag kalig-on sang napundar nga kusog sang rebolusyon sa rehiyon. Labaw pa diri, sa pinakamapintas nga paagi gintilawan sang kaaway ang kabakod, kalig-on kag kadalom sang kadalag-an sang Ikaduha nga Dungganon nga Kahublagan sa Pagpanadlong (IDKP) nga ginasulong sang rebolusyonaryo nga hublag sa nagtaliwan nga dekada. Sa bulig sang padayon nga bulawanon nga katuyuan sang IDKP, ginpangibabawan sang rehiyon ang mga pagtilaw. Ginapanan-aw sang Partido sa rehiyon ang malahalón nga pagsulong kag paglumpat sang kabilugan nga rebolusyonaryo nga hilikuton sa masunod nga tatlo ka tuig. Angot diri, hangkat sa rehiyon ang padayon nga pagpangibabaw sa mga kahinaan kag bulnerabilidad paagi sa dugang nga paghatag-atensyon sa konsolidasyon, pagbato sa konserbatismo kag komprehensibo nga pagpabaskog sa ikasarang sang Partido sa pagpamuno.


AB

ang mas baraghal nga mas mada-lom nga direktang pagpasilabot sang US sa sitwasyon kag mga inaway sa Mindanao. Labing ginhu-got sang US ang kontrol kag implu-wensya sini sa Mindanao ilabi na nga gusto sini gamiton ang isla bi-lang isa ka *forward base* sa pangka-libutanon nga "gera kontra-teroris-mo."

Sining Agosto, mahipos nga nag-abot sa Pilipinas ang grupo nga magaserbi nga mga "*facilita-tor*" sa sugilanon pangkalinungan sa tunga sang MILF kag rehimeng Arroyo. Lakip diri ang espesyal nga embahador sang US sa Middle East nga si Gen. Anthony Zinni. Sadto ginpadala si Zinni ni US Pres. George Bush sa Israel agud masiod ang nagabato nga pumuluyong Palestino sa isa ka paltik nga pag-pakigsugilanon sa mananakop kag berdugo nga gubyrno sang Israel. Nagserbi man nga tagapatunga si Zinni sa pagpasurrender sa mga mi-litanteng pwersa sa Aceh, Indone-sia sa berdugo nga militar sang Indonesia. Upod ni Zinni sanday anay Ambassador Richard Murphy sang US, Bise Pres. Harriet Hentges sang USIP kag anay *deputy chief of mission* sa Manila nga si Eugene Martin. Kabahin man sang tim sang USIP sanday Nicholas Platt, Step-hen Bosworth kag James Weisner, lunsay mga anay ambador sang US sa Pilipinas.

Partikular nga katuyuan sang USIP nga gamiton ang paniplang kag pagpasilabot agud idiskaril ang MILF kag pahumukon ang duta agud sa pagtukod sa ulihi sang ila base sa lugar nga ini. Nagpain ang kongreso sang US sang \$50 milyon nga badyet para diri. Ginagamit man sang US ang natalana nga ipasulod na nga \$30 milyon nga ayuda agud engganyuhon ang MILF nga pumirma sa isa ka pinal nga "kasugtanang pangkalinungan."

Upisyal nga ahensya ang USIP sang gubyrnong US. Gintukod ini sang gubyrno sang US sadtong 1984 kag ginatalana sang presiden-te sini ang *board of directors*. Maat-hag ang maka-imperyalista, milita-rista kag napunta-nga-Tuo ang oryentasyon sini. Ginapamunuan ini subong ni Richard Solomon, anay Assistant Secretary of State Department kag ambador sang US sa Pilipinas. Kabahin sa lupon sang mga direktor sang USIP ang mga sekretaryo sang State De-partment, Defense Department kag ang presidente sang National



Defense University sang US. Ang iban pa naghalin sa mga ahensya paniktik kag mga prente sini, nag-kalain-lain nga sanga sang militar sang US kag nagkalain-lain nga im-peryalista kag makaTuo nga insti-tusyon sa US.

Gintukod ini sadto pa nga pa-nahon sang Cold War bilang instru-mento sang imperyalismong US para sa pagsabwag sang Low-In-tensity Conflict (LIC) sa mga lugar kon sa diin may mga rebolusyonar-yong paghimakas kag para sa pag-palapad sang kontrol kag implu-wensya sini kon sa diin wala sang desaysibo nga presensya ang US.

Ginhingalitan sang US ang mga kinagamu kag masulod ini sa pagpakuno-kuno bilang tagadala sang kalinungan sa mga lugar nga daan wala ukon mahina ang kontrol kag impluwensya diri. Lakip diri ang mga independyente nga pung-sod, mga anay sakup sang Soviet Union sadtong panahon sang Cold War, mga pungsod nga Islamiko,

madamo sa nagamu nga pungsod sa Africa kag iban pa nga pungsod nga mas mabaskog ang kontrol kag impluwensya sang mga imperyalis-ta sa Europe.

Nagapadala ang USIP sang mga "eksperto" nga magahatag sang "a-biso" sa kondukta sang sugilanon pangkalinungan. Kabahin sa mga lugar nga ginatutukan sang USIP ang Balkans, Angola, Ethiopia-Eritrea, Rwanda, Burundi, Congo-Zaire, Somalia, Sudan, Zimbabwe, Palestine, Afghanistan kag Iraq. Ginaabisuhan man sini ang gubyr-nong US kon paano mapadali ang pagpasilabot kag mapabaskog ang kontrol kag impluwensya sini sa Middle East, Central Asia, South Asia, Southeast Asia kag iban pa nga lugar nga may daku nga kon-sentrasyon sang mga Muslim. Isa ka taktika sini ang paggamit sang "diplomasya sang pwersa," nga wala sang iban kundi pagpanglu-bag sa mga mahina kag papet nga gubyrno kabaylo ang ayuda kag pautang.

Gingamit sang gubyrnong Bush ang mga terorista nga atake sadtong Septyembre 11, 2001 agud iduso ang dugang pa nga pangpulitika nga pagpasilabot sa mga independyente nga pungsod kag yadtong may rebolusyonaryo ukon makabanwa nga kahublagan. Sa partikular, ginatukod sini ang "Special Initiatives on the Muslim World" bilang kabahin kag katim-bang sang "gera kontra-teroris-mo" agud pasilabtan ang mga proseso pangpulitika sa mga pungsod nga Muslim. Nag-akto man ini bilang propagandista sang armadong interbensyon kag pagpapanalakay sang US. Kabahin sa pinakaulihi nga proyekto sini ang pagpagguwa sang mga "pana-nalawsaw" bahin sa "pagkamata-rung" sang pagpanalakay sa Afghanistan kag Iraq kag sa ginahimo nga "rekonstruksyon" subong didto sang US.

Nagabaskog nga paghimakas unyon sa SMC

“Waskon ang IBM-SMC (Ilaw Buklod ng Manggagawa-San Miguel Corporation) antes matapos ang 2003.” Ini ang mandu ni Eduardo “Danding” Cojuangco sa iya mga tinawo sadtong ikaduha nga tunga sang 2002. Gilayon ginumpisahan sang mga gaway ni Cojuangco ang kumprehensibo nga pag-atake sa mga unyon nga kadampig sang IBM, ang pederasyon sang mga matuod, nagabato kag makabanwa nga unyon sa San Miguel Group of Companies. Lakip man sa mga gin-atake ang unyon sang Cosmos Luzon (ginbakal ni Cojuangco halin sa mga Concepcion sadtong 2001) nga nakadampig sa NAFLU, isa man nga militante nga pederasyon. Ang IBM kag NAFLU lunsay kabahin sa Kilusang Mayo Uno (KMU).

Daku ang papel nga ginatungdan sang IBM sa pagpasulong sang kaayuhan sang mga mamumugon sa isa sa pinakadaku kag pinakamabaskog magkita nga empresa sa Pilipinas. Sining nagtaliwan nga tatlo ka tuig, ginpamunuan sang IBM ang kolektibo nga negosasyon kag iban pa nga paghimakas unyon nga nakaangkon sang signipikante nga mga benepisyo para sa masa nga mamumugon. Pila lang sa mga korporasyon sa idalom sang San Miguel Group of Companies nga may halos dulugan napadaog nga *collective bargaining agreement* (CBA) nga paborable sa mga mamumugon ang SMC Brewery; Campo Carne; La Tondena Distillers Inc. (subong Ginebra San Miguel Inc.) sa Cabuyao, Laguna; Philippine Dairy Products Corporation (subong Magnolia Corp. na); kag Primepak.

Bangud sa wala kutod nga panindugan sang IBM para sa kaayuhan sang mga mamumugon, nagaa-gi ini subong sang dugang presyur. Pito ka unyon sa idalom sang IBM ang nagaatubang sang masingki nga away. Ini ang mga unyon sa SMC Brewery sa Metro Manila; Ginebra San Miguel Inc. sa Cabuyao, Laguna; kag Monterey. Dugang diri, ginapresyur man ang San Miguel Group Cooperative. Kon tipun-tipunon, masobra 4,600 ka mamumugon ang imbolbado diri, lakip ang linibu-libo nga kaswal.

Pinakadaku diri kag nakaagi sang tanan-nga-bahin nga atake ang unyon sa SMC Brewery sa Metro Manila nga nagasakup sa masobra 2,000 ka mamumugon sa Polo Brewery, Glass and Metal Closure, Pandacan Complex kag ang tatlo ka dalagku nga bodega. Tuig-tuig halin ulihi nga kwarto sang 2001 pa lamang nagpasaka sang mga himu-himo nga kaso batuk sa unyon si Reggie Regala, isa ka dalag nga lider unyon kag kahimbon sang maneydsment. Kabahin sa mga pilit ginakaso sa unyon ang oportunismo sa pinansya kag indi pagsunod sa pila ka teknikal nga rekisito sang Bureau of Labor Relations. Sa mga basehan nga ini, ginatinguha ni Regala nga agawon ang unyon halin sa IBM kag isipon ini sa Association of Genuine Labor Organizations ukon ALO, nga ginpamunuan sang mga oportunista nga traidor. Sunod-sunod man ang pagkalutos sang unyon sa mga kaso nga ginpasaka batuk diri kag pati mga apela ginbasura sang mga bayaran nga korte.

Samtang, bangud sa nagapadayon nga pagtinguha nga waskon ang unyon, pagpahalin kag pilit nga pagretiro sa 118 ka mamumugon kag hayagan nga paglapas sa CBA, nagpasaka sang *notice of strike* ang mga mamumugon sang SMC Brewery sadtong Marso, nga



gin-abangan sa paagi sang *Assumption of Jurisdiction* (AJ) sang DOLE sining Mayo. Bisan ginagamit subong sang maneydsment sang SMC ang AJ agud pungan ang anuman nga tikang sang IBM, wala napungan ang kumpanya nga magpahalin pa sang mas madamo nga mamumugon.

Sa kaso naman sang Ginebra San Miguel Inc. sa Sta. Barbara, Pangasinan, naggaguwa nga inutil ang mga korte sang balewalaon sang maneydsment ang sunod-sunod nga mga desisyon sini nga paborable sa mga mamumugon. Madinalag-on nga napahalin paagi sa isa ka *certification election* sadtong Septyembre 2002 ang dalag nga Association of Labor Unions-TUCP bilang tiglawas sang mga mamumugon. Ugaling wala ginkilala sang maneydsment ang bag-o nga unyon nga kadampig sa IBM kag pilit nga ginapalamon gihapon sa mga mamumugon ang wala pulos nga “sweetheart” CBA nga himbunanay sang kumpanya

sundan sa “SMC...,” pahina 11



Ka Bert Olalia—dungganon nga baganihan sang sahing mamumugon

Gindumdum sadtong Agosto 5 ang isa ka gatos nga anibersaryo sang pagkabun-ag ni Felixberto “Ka Bert” Olalia, isa ka maayo nga komunista, nagabato nga unyonista, beterano sang militante nga kahublagan pangabudlay sa Pilipinas kag tagapagpundar sang Kilusang Mayo Uno (KMU).

Ginasalaming sang kabuhi ni Ka Bert lunsay ang mga kabudlayan nga gin-agyan kag mga kadalagan nga naangkon sang kahublagan pangabudlay sa pungsod.

Ginbun-ag siya sa isa ka imol nga pamilya sa Tarlac sadtong Agosto 5, 1904 kag nagsugod magpangita sa edad nga 16. Una siya nga nagtrabaho sa isa ka pabrika sang sapatos sa Manila kon sa diin ginpangunahan niya ang pagtukod sang unyon para ipakig-away ag mas makatawo nga kahimtangan pangabudlay para sa mga mamumugon. Gintukod niya sadtong 1920 ang Union de Chineleros y Zapateros de Filipinos, ang isa sa pinakauna nga unyon pang-industriya sa pungsod. Nagserbi siya nga sekretaryo sini umpisa 1920 tuhtub 1925 kag presidente umpisa 1925 tuhtub 1940.

Sa pinakaumpisa wala ginabu-

lag ni ka Bert ang iya pagka-unyonista sa pag-entra sa pangkabilugan nga demokratiko nga kahublagan nga nagatib-ong sa interes kag kaayuhan sang mayorya nga pumuluyo nga ginahimuslan kag ginapi-gos. Sadtong 1939, nangin pangkabilugan nga sekretaryo siya sang Katipunan ng mga Anakpawis sa Pilipinas kon sa diin nakaupod niya si Ka Crisanto Evangelista kag iban pa nga makabanwa nga lider nga nagabato para sa independensya batuk sa kolonyalismong Amerikano.

Sang magsalakay ang mga imperialistang Hapon, nangin kumander si

sundan sa “Ka Bert...,” pahina 12

“SMC...,” halin sa pahina 10

kag mga dalag nga lider sang ALU.

Nalutos ang ALU sa tanan nga ligal nga kaso, halin sa DOLE tuhtub sa Korte Suprema. Bangud sa pagbasura sang maneydsment sa mga desisyon sang korte, lumupok ang welga sang mga mamumugon sadtong Enero 2003. Nagpagguwa sang AJ ang DOLE pagkatapos sang siyam ka adlaw. Pito ka bulan na nga ginasupak sang mga mamumugon ang AJ kag pana-panahon naparalisa sang welga ang produksyon sa planta.

Matuod may bangaan sanday Gloria Arroyo kag Cojuangco angot sa pagkontrol sa SMC kag mga kaangot nga empresa kag nagaaway sila subong bilang paghanda sa engkwentro sa eleksyon 2004, matingkad sa mga away sa sulod sang San Miguel Group of Companies ang nagapadayon nga himbunanay ni Cojuangco kag gubyer-

nong Arroyo sa pagwasak sa militante nga unyonismo. Partikular sa San Miguel, sin-o man ang mangibabaw kanday Arroyo kag Cojuangco pat-ud makapadipulos kon madula ang IBM kag mabayluhan ini sang *company union* ukon isa ka unyon nga maka-kapitalista. Nagapati man pareho si Cojuangco kag si Arroyo nga ang pagwasak sang militante nga unyonismo sa SMC nagakahulugan sang dalayon nga pagkawasak sang KMU, ang progresibo nga sentro sang pangabudlay.

Kabulig nanday Arroyo kag Cojuangco sa tuyo nga pagguba sa militante nga unyonismo ang mga pederasyon nga kapot sang mga oportunista nga traidor. Partikular nga ginapaboran ni Cojuangco nga ibulos sa IBM ang Alab-katipunan, nga ginapamunuan ni Nilo de la Cruz, lider sang RPA-ABB, bangud nangin pribado nga hangaway na ni Cojuangco ang RPA-ABB sa Negros. Pero bukas man si Cojuangco sa

iban pa nga dalag nga pederasyon sang magpamalibad ang mismo mga abugado ni Cojuangco sa pagayon niya sa Alab-Katipunan. Indi mapahamtang ang mga abugado sa ila katraidoran nga ginpakita na ni de la Cruz kag sang RPA-ABB.

Ang tuyo nga pagwasak sa IBM kabahin lang sa nagasingki nga pagpresyur sa kubay sang mga mamumugon kag pagbawi sa mga benepisyo nga isa ka gatos ka tuig nga ginpakig-away sang kahublagan pangabudlay. Ang maitom nga plano ni Cojuangco kag gubyrno Arroyo nga waskon ang IBM kag ang iban pa nga matuod, nagabato kag makabanwa nga unyon sa idalom sang KMU dapat wala untat nga mabuyagyag kag batuan sang mga mamumugon kabulig ang pumuluyo kag iban pa nga pwersa nga nagatib-ong sa paghimakas sang sahing mamumugon kag sa paghimakas para sa demokrasya, kahilwayan kag hustisya sosyal. AB

Ka Bert sang Hukbong Bayan Laban sa Hapon sa Manila Capital Region. Pagkatapos sang Ikaduha nga Gera Pangkalibutanon, upod siya sa mga nagtukod sang Congress of Labor Organizations, ang sadto pinakadaku kag pinakamabaskog nga pederasyon. Kalakip diri ang dalagku nga unyon sa mga pribado nga kumpanya kag upisina sang gubyerno pareho sang Meralco, Nawasa, National Development Corporation, Manila Railroad and Railways kag Engineering Island. Nangin presidente man siya sang Katipunan ng mga Kaisahang Manggagawa (KKM). Sa una nga National Labor-Management Conference nga ginhiwat sadtong Hulyo 1951, siya ang nagserbi nga tiglawas sang sektor sang pangabudlay.

Ginbungkag ang KKM sang arestuhon si Ka Bert sadtong 1951 sa malaparan nga kampanya sang pagtapna batuk sas militante nga unyonismo. Kalakip man sa gindakup kag ginhunong si Ka Amado V. Hernandez.

Liwat siya nga gindakup kag ginhunong sadtong 1956 sa kaso nga rebelyon. Sa pihak sang amo nga mga pangpresyur sang estado, nagpursiger siya sa pag-organisa sa mga mamumugon. Wala magdugay pagkahilway niya, gintukod niya sadtong 1957 ang National Federation of Labor Unions (NAFLU). Nangin pangaduha nga tagapangulo siya sang Katipunan ng Manggagawang Pilipino sadtong 1959, bise presidente sang Lapiang Manggagawa sadtong 1962 kag pangapangulo sang Malayang Samahang Magsasaka sadtong 1964. Nangin aktibo man siya sa Movement for the Advancement of Nationalism sadtong 1966.

Sang gindeklarar ang layi militar sadtong 1972, gin-agyan liwat ni ka Bert kag sang militanteng unyonismo ang salsalon nga kamot nga nagabawal sa tanan nga unyon kag pagwelga. Gindakup si Ka Bert

sadtong Oktubre 1972 kag masobra apat ka bulan nga ginpriso sa kaso nga subersyon. Sa pihak sini, maisog siya nga nanindugan para sa kaayuhan indi lamang sang mga mamumugon kundi sang tanan sang pumuluyo nga nagahandum sang kahilwayan kag demokrasya. Nangin kabahin siya sang Komiteng Tagapagpatuman sang National Democratic Front (NDF) sadtong temprano nga bahin sang dekada 1980. Nangin katapu man si Ka Bert sang liwat nga gintukod nga Partido Komunista sang Pilipinas. Sadtong 1980, pagkatapos ang halos isa ka dekada nga pagpamuno sa pagtinguha sang militante nga kahublagan pangabudlay nga nagsulong sa pihak sang mabaskog nga pasistang teror, ginpamunuan ni Ka Bert ang mapangahas nga pagtukod sang KMU. Pila ka pulo ka libo nga mamumugon kag iban nga sektor ang nagsupak sa mga restriksyon nga ginpapanaog sang diktaduryang Marcos kag nagtipon sa Araneta Coliseum sa Quezon City para palig-unon ang pagkatukod sang patriyotiko kag militante nga sentro sang pangabudlay. Umpisa sadto, epektibo nga nakapamuno ang KMU sa pagpabaskog kag pagpasulong sang tunay, militante kag makabanwa nga kahublagan sa pangabudlay sa Pilipinas.

Nakibot ang diktadurya sa ginpakita nga kaisog kag paghiliusa sang organisadong pangabudlay upod ang bilog nga nagahimakas nga pumuluyo. Wala magdugay liwat gintinguha sang rehimeng Marcos nga bunalan ang militante nga kahublagan pangabudlay. Ginaresto si Ka Bert kag iban pa nga militante nga lider-mamumugon sadtong Agosto 13, 1982 sa kaso nga sedisyon kag subersyon. Sa iya edad kag mahina nga ikaayong lawas, ginbartolina sang rehimen si Ka Bert, bagay nga wala niya masarangan sang iya lawas. Naglala ang iya balatian sa tagipusuon kag namatay siya sa kumplikasyon nga

pulmonya sadtong Disyembre 4, 1983, sa ikawalo ka bulan sang iya pagkahunong.

Isa ka adlaw antes siya mamatay, nahimo pa niya magpaabot sang mensahe sa mga mamumugon nga nagarali sa Plaza Miranda. Sa pihak sang kahinaan sang iya lawas, mabatyagan sa mensahe ang kapagsik sang iya nagapabato nga diwa kag ang makasahi nga pagkangil-ad sa nga nagpriso sa iya kag nagapigos sa pumuluyo. Mas mapalad pa, siling ni Ka Bert, ang mga alila nga idu kag totoy ni Irene Marcos (anak sang diktador), bangud nagakaon sila sa oras, napabulong kag nakapuyo pa sa palasyo.

Kon buhi pa subong si Ka Bert, pat-ud nga sa unahon gihapon siya sang mga paghimakas sang sahing mamumugon kag iban pa nga ginahimuslan kag ginapigos nga pumuluyo, labi na nga wala sang kapareho kasingki ang atake sang estado subong sa ila mga kinamatarung kag kaayuhan. Halos tanan nga ginpakig-away ni Ka Bert kag sang militante nga kahublagan unyon, pareho sang pagpalip-ot sa oras sang pagtrabaho umpisa 12 pakadto walo ka oras, ang Magna Carta of Labor, ang Women and Child Labor Law, ang Minimum Wage Law kag iban pa ginabasura na sang papet kag reaksyunaryo nga estado nga instrumento sang mga dumuluong nga kapitalista kag lokal nga burgesya kumprador.

Sa isa ka gatos nga anibersaryo sang pagkabun-ag ni Ka Bert kag duha ka dekada nga nagtaliwan sugod sa iya pagkapatay, ang nagabato nga diwa kag ginpanubli ni Ka Bert nagapabilin nga buhi sa militante nga pangabudlay nga nagapursiger sa away sang sahing mamumugon para sa gilayon nga pagpahilway sang ila sahi kag sang bilog nga pumuluyong Pilipino halin sa dumuluong kag lokal nga paghimulos kag pagpamigos kag para sa sosyalismo. AB



Nagasulunod nga mga taktikal nga opensiba, ginlunsar sang BHB subong nga Agosto

NAPULO'G walo ka suldado ang napatay kag indi mag-nubo sa lima ka mabaskog nga kalibreng armas ang naagaw sa anum ka madinalag-on nga taktikal nga opensiba sa nagkalain-lain nga bahin sang Pilipinas. Anum man ka suldado ang napilasan kag lima ka malip-ot nga armas ang nakumpiska, luwas sa iba pa nga kagamitan.

Sa Quezon. Ginsalakay sining Agosto 19 sang mga Pulang hangaway sang Apolonio Mendoza Command sang BHB ang barko sang Philippine Navy (PN) nga nakadungka sa Barangay Ungos, Real kag ang kalapit nga hedkwarters sang Philippine Coast Guards (CG).

Udto-adlaw sang hinali paulanan sang mga bala ang barko nga Patrol Fast Craft-352. Pagkatapos sini ginsalakay ang hedkwarters sang CG sa Real, nga may 50 metros lang ang kalayuon sa barko sang PN. Naagaw sang BHB ang isa ka M60 *light machinegun* (LMG), isa ka 9 mm, duha ka .45 kag duha ka M16.

Duha ka suldado ang namatay kag lima ang napilasan sa reyd, upod ang mga reimprorsment nga tropa sang gubyerno.

Sa Oriental Mindoro. Halos duha ka oras lang pagkatapos sang pagsalakay sa Quezon, apat ka elemento sang 19th Special Forces Company ang napatay sang malukpan sang bomba ang ila ginasakyan nga dyip sa Barangay Malitbog, Bongabong. Lakip sa mga namatay sanday 2Lt. Cayetano Curitana, CO, kag 2Lt. Diovie Villanueva.

Duha ka suldado kag isa ka pulis ang namatay sang ambusan sila sang BHB sa Sablayan, Occidental Mindoro sa amo man nga adlaw. Tatlo ka M16 ila naagaw.

Sa Davao Oriental. Gin-ambusan kag napatay ang lima ka tropa sang Philippine Army 55th Engineering Brigade sang Agosto 19 man sa banwa sang Baganga. Isa pa ka suldado ang napilasan sa ambus nga ginhimo sang 2nd Pulang Bagani Company.

Sa Catanduanes. Ginsilutan sang BHB sadtong Agosto 16 si Chief Insp. Loreto Tablizo, *deputy director* sang PNP sa prubinsya. Nakaguwa lang ni Tablizo sa bulangan sa Barangay Valencia, Virac sang ambusan siya sang mga Pulang hangaway.

Sa Negros Oriental. Tatlo ka suldado sang 11th IB lakip ang isa ka upisyal, ang namatay sa ambus sang BHB sa Barangay Linuthangan, Canlaon City sadtong Agosto 6. Napatay sa ambus sanday 1Lt. Geisson Regner, *commanding officer* sang Charlie Company sang 11th IB, S/Sgt. Edwin Alen, kumander sang detatsment sa Asay, La Castellana kag isa pa ka sundalo.

Sakay sila sa isa ka dyip padulong sa Moises Padilla sang ambusan sila. Nakumpiska ang tatlo ka M16, isa ka .45, mga *cellphone*, bakpak kag botas.

Pagpabulong sa lapsag sang detenido pulitikal, gina-insister

GINA-INSISTER sang Health Action for Human Rights (HAHR) kag Gabriela sadtong Hunyo 24 sa AFP kag rehimeng Arroyo nga gilayon salbaron ang kabuhi ni Baby Gabriela Llesis kag hilwayon ang iya ina nga si Zenaida halin sa pagkahunong sini sa Bukidnon Provincial Rehabilitation Center.

Nadakop sang militar sadtong Agosto 5, 2002 si Zenaida Llesis sa isa ka reyd sa Pangantugan, Bukidnon. Ginpriso kag wala siya ginhatagan atensyon medikal bisan ginabusong na niya sadto si Baby Gabriela. Bunga sang mabaskog nga presyur sang mga interogasyon militar, naghina ang ikaayong lawas ni Zenaida kag naapektuhan ang lapsag. Pila ka adlaw pa pagkatapos mabun-ag si Baby Gabriela, ginsulod sa ospital ang mag-ina nga lunsay may balatian.

Pangurakot sang mag-asawa Arroyo, ginbuyagyag

SINING Agosto 18, ginbuyagyag ni Sen. Panfilo Lacson ang lapnagon nga pangurakot sang mag-asawa Arroyo. Gindetalye sang manughugakum man nga senador ang pagkuripon sang mag-asawa sang daku nga kantidad halin sa mga iligal nga kontribusyon kag suhol. Suno kay Lacson, gintago sang mag-asawa ang masobra P200 milyon sa Lualhati Foundation kag nagkalain-lain nga *dummy bank accounts*. Siling niya, ginagamit ni Mike Arroyo ang pangalan nga "Jose Pidal" agud itago sa isa ka *bank account* sa Makati ang masobra P36 milyon. Gintumod ni Lacson ang suod nga abyan sang pamilya Arroyo, nga kerida man ni Mike Arroyo nga si Victoria Toh bilang mga "benepisyaryo" sang ginakuripon nga manggad.

Dugang diri, ginhingadlan ni Lacson ang mga institusyon kag personalidad nga nagbubo sang minilyun-milyon sa pondo pangkampanya ni Gloria Arroyo sadtong 1998. Kalakip diri ang bupete sang Carpio, Villaraza and Cruz kon sa diin naghalin indi lamang ang mga abugado kag hukom sang rehimen kundi pati si Simeon Marcelo, Ombudsman subong. Sa listahan man ang isa ka Franklin Fuentebella nga imbolbado sa lapnagon nga anomalya sa paggamit sang pondo sang mga *investor* sa Multitel, ang ismagler nga si Lucio Co kag ang anay kroni ni Estrada nga si Mark Jimenez.

Indi pagbayad sang renta sa duta ginlunsar sa Cagayan Valley

NAGPANAWAGAN ang Pambansang Kapisanan ng mga Magsasaka sa Pilipinas-Cagayan Valley (PKMP-CV) sa mga apektado sang bagyo nga Harurot nga ipakigbato ang kinamatarung nga indi magbayad sang renta sa duta. Ang mga mangunguma sa Cagayan kag Isabela nag-angkon sang pinakadaku nga kahalitan halin sa bagyo Harurot nga naghalit sa Naaminhang Luzon kag iban pa nga bahin sang pungsod sadtong Hulyo.

Ginkasa ang kampanya sadtong Agosto 5 agud iinsister sa mga agalon nga mayduta kag mga nagpautang nga komersyante nga indi magsukot sang renta kag pautang. Santo ini sa mga pagsulundan sa Rebolusyonaryong Gabay sa Reporma sa Duta nga nagasaad nga kon ang nasamad 20% sang ani, indi dapat magbayad sang renta sa duta sa tuig nga ina. Kon 50% pataas ang nasamad, duha ka ani ang indi pagbayaran nga renta.

Pagmina kag pagtroso sa Samar, ginpamatukan

MABASKOG ang pagpamatuk sang pumuluyo sa pagbalik liwat sang mga minahan sa isla sang Samar kag sa padayon nga pagkawasak sang kapalibutan sini. Ginpakita nila ini sa ginlunsar nga caravan sang mga trak, kotse, dyip kag motorsiklo sadtong Agosto 8 kon sa diin pila ka gatos nga mangunguma kag mangingisda, mga pamatan-on, mga akademiko, katapu sang *non-governmental organizations* (NGOs), upisyal sang gubyerno kag lider sang simbahan Katoliko ang nagasinggit sang “No Mining, Yes to SINP” (Indi kami sa pagmina, sugot kami sa SINP—Samar Island National Park). Base sa konsepto sang SINP, pagapunggan ang pagmina kag pagpangtroso agud makabawi ang bilog nga Samar sa pagka-ubos sang daku nga bahin sang duna nga manggad sini kag sa gintuga nga pagkasamad sang kapalibutan.

Ginlibot sang *caravan* ang tatlo ka prubinsya bag-o magderetso sa Catbalogan, ang kabisera sang Samar. Gin-insister sang mga demonstrador kay Presidente Arroyo ang pagpauntat sa mga operasyon sang mga minahan kag ang pagpadasig sa proklamasyon sang Samar Island National Park.



Abimael Guzman, naglunsar sang hunger strike

NAGALUNSAR subong sang *hunger strike* ukon pag-ayuno si Abimael Guzman, pangunahon nga lider sang Senero Luminoso, isa ka rebolusyonaryo nga hublag sa Peru. Nag-ayuno si Guzman sa iya prisohan agud pamatukan ang pagpaidalom sa iya kag asawa niya nga si Elena Ipparaguirre sa *solitary confinement*.

Si Guzman, upod si Ipparaguirre, iligal nga gindakup kag ginsentensyahan sang korte militar sang tuhtub buhi nga pagkabilanggo sadtong 1992. Sining Mayo, gindeklarar sang mas mataas nga korte sang Peru nga “indi konstitusyunal” ang ginhimo nga pagbista sa duha kag ginmandu ang liwat nga pagbukas sang ila mga kaso.

Pagginahum sang US sa Iraq, labing ginatublag

SINING Agosto 19, ginbomba sang wala pa magpakilala nga grupo ang hedkwarters sang United Nations sa Baghdad, Iraq. Napulo’g lima katawo ang gilayon napatay samtang masobra 100 ang napilasan. Kalakip sa napatay si Sergio de Mello, ang pangunahon nga tiglawas sang UN sa Iraq. Ang pagpangbomba nagapakita sang pinakamabaskog nga bunal sa ginahimo nga “rekonstruksyon” sang imperyalismong US sa Iraq.

Antes sini, ginbomba man sang mga Iraqi sadtong Agosto 17 ang tubo sang langis (*pipeline*) nga nagserbi nga pangunahon nga alagyan sang langis halin sa syudad sang Kirkuk, naaminhang Iraq padulong Turkey. Tatlo ka adlaw pa lang ang nakalipas sang buksan sang US ang mga pipeline. Nagaagi sa nasambit nga *pipeline* ang 40% sang kabilugan nga produksyon sang langis sa Iraq. Maathag ang intensyon nga lubos untaton ang pag-ilig sang langis pakadto sa mga ripenariya kag iban nga pungsod.

Yabi sa pagpanakup sang US sa Iraq ang langis sini. Samtang nagalawig, labing nabudlayan ang US nga kontrolon kag panginpuslan ang manggaranon nga rekursong sang langis sang pungsod bunga sang malaparan kag mabaskog nga pagbato sang pumuluyo. Nagaabot sa abereyds nga isa ka suldado nga Amerikano kada adlaw ang ginapamatay sang mga pwersa nga Iraqi sa sunod-sunod nga pagpakig-away sang mga ini sa mga pwersa sang US.

Presidente sang Liberia, ginpahalin

SA sulsol sang imperyalismong US, ginpahalin sadtong Agosto 11 ang presidente sang Liberia (isa ka pungsod sa nakatundang Africa) nga si Charles Taylor bunga sang lapnagon nga armado kag di armado nga pagbato sa iya rehimen.

Si Taylor nangin presidente sang Liberia sadtong 1989 paagi sa maduguon nga kudeta nga suportado sang US. Tampok sa iya pasista nga pagginahum ang sunod-sunod nga gera sibil nga nag-abot sa maduguon nga inaway sa Monrovia, kabisera sang pungsod, sining Agosto. Gilayon nga nagpadala sang mga pwersa militar ang US sa pungsod agud mapat-ud ang pag-atras ni Taylor kag mapwesto ang pinakabag-o sini nga idu sa Liberia.



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXIV No. 14
Agosto 21, 2003
www.philippinerevolution.org

Editorial

Ginatuytoy sang AFP ang dalan sang kapaslawan

Ang dalan sang pagpangapin sa papet, reaksyunaryo kag nagakadunot nga nagaharing sistema amo ang dalan sang kapaslawan nga ginasanod sang mersenaryo kag papet nga Armed Forces of the Philippines. Samtang nagakadugmok ang nagaharing sistema sa kumunoy sang nagapalala nga krisis, labi ini nga nagasandig sa pasismo sang nagakagaruk nga reaksyunaryo militar. Sa pihak nga bahin, nagatingkad naman ang kagarukan kag kainutilan sang AFP kag ang tendensya sini nga mawasak halin sa sulod kag dalahigon ang bilog nga sistema.

Ang yabi nga halambalanon sa pagkagaruk kag pagpangluya sang AFP amo ang pagka-mersenaryo, papet, reaksyunaryo kag pasista sini, nga nagaabot sa grabe nga pagkahamulag sini sa malapad nga masa. Ang pangpulitika nga pagkabangkarote kag pagkahamulag sini ang basehan nga kahimtangan nga ginaluntaran sang palala nga palala nga internal



nga demoralisasyon, paksyunalisasyon kag inaway.

Nagaserbi kag nagapangapin ini sa interes sang imperyalismong US kag mga

lokal nga nagaharing sahi, ginasadag ang dumuluong nga interbensyon militar kag ginasuportahan ang papet nga estado kag ang pagtraidor sini sa interes kag sobe-ranya sang pungsod. Mapintas sini nga ginatapna ang mga nagahimakas nga demokratikong pwersa kag pumuluyo. Samtang nagadugay, nagakagisi ang panabon bahin sa pagka-makapungsod sang AFP kag PNP kag nagakapukaw ang patriyotismo bisan sang mga manubo nga upisyal kag ordinaryo nga suldado.

Ang tuman kabaskog nga krisis pangpulitika kag pangkatilingban nagapugong sa ikasarang sang AFP nga lutuson ang rebolusyonaryo nga armadong hublag. Labi pa nga nagadaku ang mga sablag nga ini bangud sa madasig nga pagkagaruk sang bug-os nga nagaharing sistema.

Ginapatuman sang rehimeng Arroyo ang lapnagon nga militarisasyon kag mga pasista nga buhat sang AFP. Makatuga man ini sang pila ka problema nga taktikal batuk sa mga rebolusyonaryo kag progresibo nga pwersa, sa kadugayan mas daku naman ang pagabayaran sang AFP kag gubyerno sa patag militar kag pulitika.

Hitad nga hitad na ang mga pwersa sang AFP. Nakadispusisyon batuk sa Bag-ong Hangaway sang Banwa ang mas o menos 70%

*Mga tampok
sa isyu nga ini...*

Pagpangibabaw
sg rebolusyonaryo
nga hublag sa ST

PAHINA 6

Pagpasilabot
sang US sa sugilanon
pangkalinungan

PAHINA 8

Nagabaskog
nga paghimakas
unyon sa SMC

PAHINA 10